

Lita dl Consëi dla Uniun dles Èles: te chësc cunsëi fej sëgn pert **Renate** Valentin da Castalta, **Lucia** Valentin de Val, **Erna** Irsara da Coz, **Rosmarie** Irsara dla Müda, **Roberta** Rubatscher da Pedraces y **Martina** Pitscheider da Ruac.
Rengraziun dl gran laur che ales fej fora por düt l'ann cun gran lezitënza.

Oferta: bel giulan dl'oferta por les misciuns che é stada de 870,37€.

L'comité di jogh de Badia lascia alsavëi che chësc ann ne gnará i jogh nia plö tuc sö cun 14 agn, mo le proscimo ann cun 15 agn (y i agn do impurmó cun 16 agn, sciöche al vëgn fat ince te scialdi düc i atri paisc). Chësc por plö motifs: na gran desfarënza d'eté, pücia partezipaziun ales ativités, pücia liberté da pudëi tó pert a val'ativités por gauja de segurëza y responsabilité da pert dl comité.

"Nöt dla plüra y dla consolaziun": düc chi che plüra na porsona é inviá en sabeda, ai 31.10.2015 dales 19:00 te Ciestel de Tor a S.Martin.

Leonardiritt a Bad Tölz: al vëgn organisé da "Alta Badia Bus" ai 06.11.2015. Prenotaziuns pro Hubert al nr.tel. 3482615668 cina ai 31.10.2015. Le iade costa 35,00 € a porsona.

Ciamena dal quant a Picolin: ala sará stlúta por i proscimi mëisc, por trasferimënt te atri local. Canche ai deura indô gnaral lascé alsavëi.

Badiamusica inviëia en jöbia, ai 29.10.2015 dales 20:00 tla Ciasa Runcher a n concert cun le ensemble "Windkraft" adüm cun le atur Simon Kostner che portará dant por le pröm iade l'opera "La storia dl suldá" de I.Stravinskij tl lingaz badiot.

Referat: cun dr.Gregorio Rungger dal titul „Le bot al ce - ictus“ en mertesc 03.11.2015 dales 20.00 te Ciasa de Palsa a San Martin de Tor.

Referat: "Co, ne savóst nia? Al tól ite droghes. Canch' i ultimi al savëi é i geniturs y parënc" ai 27.10.2015 dales 20.00 te Ciasa J.B. Runcher.

Quant por i profugs: al vëgn chirí adüm quant da d'invern che pó gní dé jö a La Val tla Ciasa dles Uniuns ai 31.10.2015 dales 09:00 ales 11:00.



En mertesc, ai 27.09.2015 complësc **Franz Pedratscher** da Pedraces **89** agn y en jöbia, ai 29.10.2015 **Carlo Irsara** Damez **86** agn. L'Seniorenclub y düta la Comunité ti aoda düt l'bun, sanité y benedisciun de Dî.



Usc dla Cüra **BADIA**

Tel./Fax 0471 839571 - E-Mail: parrocchiabadia@libero.it - www.valbadiaonline.it

Nr. 48

Edema: 25.10.– 01.11.2015

*Và! Tüa fede
t'à salvé*



Vangele dla proscima domënia - Gnissant - Ann „B“

(Mati 5, 1-12)

Te chël tëmp, canche Gejü odô le gröm de jënt, él jü sön na munt. Al s'á senté jö, y sü discepuì ti é jüs pormez. Spo ál metü man da baié y i istruf. Al á dit: Beac, chi che é püri dan da Idî; deache de d'ëi é le règn dl cil. Beac, chi che plüra; deache ai gnará consolá. Beac, chi che é saurisc; deache ai arpará la tera. Beac, chi che á fan y sëi do la iustizia; deache ai gnará pascentá. Beac, i misericordiusc; deache ai cïafará misericordia. Beac, chi che á n cör nët; deache ai odará Idî. Beac, chi che fej pésc; deach'an ti dijará fis de Dî. Beac, chi che vëgn poseghitá por gauja dla iustizia; deache de d'ëi é le règn dl cil. Beac sëise os, sc'i gnëis dejonorá y poseghitá y scraia fora a vigni manira por mia gauja. Ralegresse y iubiledo: Osc paiamënt tl cil sará gran.

FUNZIUNS SACRES

25.10. XXX. DOMÈNIA dl ANN / B

- 10.00 Mëssa por la Comunità • Ora da d'invern •
15.00 Festa da Bato
17.30 Prozesciun dles Ciandères da S.Linert a Oies
18.00 a Oies: Mëssa cun dütes les Cüres
†to Giovanni Dapunt - aniversar
†to Rudolf Bergmeister
por fam. Paolo y Rita Crepaz

27.10. Mertesc

- 19.30 †ti Nazio y Giovanni Pizzinini - aniversar
†to Sepl Daprè
†to Antonio Palumbo

28.10. Mercui - Mëssa cun i scolars dla elementara

- 07.30 †ti Carlo y Marcella Palstrong - aniversar
†ti Maria y Gerolamo Grigoletto
vis y defunc Alfarei de Parüs

29.10. Jöbia - Mëssa cun i confermá y studënc

- 19.30 †ti Giuseppe y Notburga Burchia – aniversar
†to Erich Canins y familia
por fam. Luis y Rita Lerchegger en rengraziamënt

30.10. Vëndres

- 07.30 †ta Zenzl Costa - aniversar
†ta Hedwig Costa - aniversar
†to Paul Ploner

31.10. Sabeda

- 16.00 S.Mëssa a Oies

01.11. DOMÈNIA – FESTA de GNISSANT dl ANN / B

- 10.00 Mëssa ciantada solena por la Comunità
14.00 Öspi de Gnissant – Funziun di morc y vijita te curtina
18.00 †ti Antonia y Hermann Nagler - aniversar
†ti Zisca y Vijo Canins - aniversar
†ti Alfarei de Andrac

Dala VITA dla CÜRA

La Jungschar / Schira Jonila á indô metù man

Pro la vita dla Cüra alda ince dër la Schira Jonila y i Ministranc.
Les mitans dla mesana fej Jungschar cun la Carolin P., Jessica B.
y Elisa M. de vëndres/sabeda.

I Ministranc fej inant súa ativité y bel sorvisc te dljia. Dilan!

Siur Degan

Festa de GNISSANT

Gnissant: mëssa dales 10:00 - **De dles Animes:** mëssa dales 09.00.

En preparaziun a Gnissant sarál chëstes ocasiun da se confessé:

sabeda, ai 31.10.2015 dales 08:00 ales 10:00

De de Gnissant dales 08:00 ales 09:00 y dales 17:00 ales 18:00

De dles Animes dales 08:00 ales 09:00.

Comuniun ai amará: por podëi se arjigné ca a Gnissant vá siur Degan
bel chësc vëndres, ai 30.10.2015 dales 09:30 inant a proveder.

Conclujiun dl'Edema dla Fede: en chësta domènia, ai 25.10.2015 sarál
dales 17:30 la prozesciun cun les ciandères da S.Linert a Oies y dailó
spo la santa mëssa. Düc é inviá a tó pert.

Dedò, por gní jö, fossel d'aconsié da se tó do na patrî o na lüm.

Bato: chësta domènia, ai 25.10.2015 ciafa l'Sacramënt dl BATO la picera
Viktoria de Mutschlechner Sven y Vanti Marika. Ala picera che tolun sö
cun ligrëza te nosta comunité cristiana y a súa familia les mius audanzas.

La proscima preparaziun al Bato sará en sabeda, ai 14.11.2015 dales
15:00 a S.Ciascian te salf de calonia. Chi che á na picera creatöra da
batié é inviá a tó pert y a se anunzié al nr. 0471/849372.

L'grup "Umes prëia deboriada" se abina en mercui, ai 28.10.2015
dales 20.00 te dljia por n'ora de oraziun.

Legio Mariae: chësc grup tëgn n'ora de oraziun en jöbia, ai 29.10.2015
dales 14:00 te calonia a chëla che düc é inviá.

Vademecum por l'organisaziun de na sopoltüra: sëgn por Gnissant
gnarál metù fora chësc foliet jö a pe de dljia che pó gní tut a ciasa. Al n'è
preodü un por vigni familia.